

日下舊聞考

(四)

日下舊聞考

(四)

欽定日下舊聞考卷一百二十一

京畿

保定縣

保定縣在州城南四十里。

明一統志

〔臣等謹按〕保定縣明屬霸州，本朝屬順天府。

縣在府南二百里，東西距三十三里，南北距二十八里。東至文安縣界二十二里，西至保定府雄縣界十一里，南至文安縣界二十三里，北至霸州界五里，東南至文安縣治四十里，西南至河間府任邱縣治九十里，東北至永清縣治七十里，西北至保定府新城縣治九十里。

大清一統志

〔臣等謹按〕保定縣所轄幅員本不甚廣，是以統屬未嘗有定。秦屬上谷，漢屬渤海，東漢又屬廣陽，晉屬章武國，隋初屬瀛州，後復屬涿郡。保定爲涿之新鎮地，唐爲幽州，五代石晉割以賂遼，屬析津。後周顯德六年，世宗置霸郡，而邑屬霸。宋置平戎軍，改保定縣，金元明仍之。蓋其地實爲瀛莫要區，設邑建官，固不在疆域之

廣狹也。

〔原〕保定本雄州歸信縣之新鎮也，其形勝乃邊陣之衝要。

九域志

〔原〕太平興國六年，以涿州歸信縣新鎮置平戎軍，景德元年改爲保定軍。

輿地廣記

〔原〕平戎軍今保定縣治。樂史、太平寰宇記，本莫州新鎮之地。太平興國六年，陞爲平戎

軍，以扼邊陲之喉。東至霸州三十里，西至莫州七十里。

大清一統志

〔臣等謹按〕大清一統志，保定漢涿郡易縣地，唐爲涿州歸義縣地。宋初爲歸信縣地，太平興國六年，置平戎軍。景德元年，改爲保定軍。蓋是時以澶淵之役，遼遣韓杞來請周世宗所取關南地，不許，始改保定之名也。

〔原〕平戎軍本雄州歸信縣之地，景德元年改爲保定軍。景祐元年，析霸州文安、大城二縣

五百戶隸軍。

九域志

〔原〕宣和七年，廢保定軍爲保定縣，隸莫州，尋依舊。

宋史

〔臣等謹按〕保定入金，卽宋徽宗宣和七年事也。是時其地已屬金之雄州。據宋史地理志所云，尋依舊者，蓋具文耳，實非宋有也。

〔原〕金爲保定縣，屬雄州。元割屬霸州，至元二年省入益津縣，四年復置。

清類天文分野之書

〔原〕保定縣，從軍名也。

郡縣釋名

●保定故城相傳宋團練使楊延朗所築。嘉靖庚戌，羽書告急，郊圻震驚。知縣事崇德呂煥首出俸錢以爲倡，乃度地量工，斟酌舊址，棄東南而依西北，以便守也。僅五月而告成，煥自爲之記。保定縣志

●呂煥修城記 城池之設，所以保障一方，爲百年計也。近時值多事，予奉檄築建，蓋守土之急務，不容緩者。但公帑空虛而力有未逮，每懷耿鬱。邑人聞之，咸相謂曰：此舉爲誰而使侯若是也？遂欣欣然各自以家私之盈縮，議備物料，以助城工。即疏名以聞於予，不越月而諸料畢集矣。且當道之省諭有曰：成大事勿惜財費。予亦曰：不一勞，不永逸。而諸尚義者之樂事赴工，適與符合。是則所賴以共成斯舉，以垂千百年屏翰之業者，非斯人而誰與？用布姓名，俾勒於石。若其賢士大夫贊予議以決其成，且捐資爲一邑倡，必有能記之者。茲不敢槩書。嗚呼！建立惟艱，尚冀後之同志君子永圖之。保定縣志

〔臣等謹按〕保定縣舊城計周六里奇六十九步，高三丈，闊二丈，導玉帶河以環其外。今舊址尚存。新城計周八百八十九步，高一丈五尺，即呂煥所謂棄東南而依西北以便守者。新城凡四門：東曰通和，南曰南薰，西曰惠安，北曰玉流。環聚其上，皆有敵樓。謹附載以備考。

●原縣治及學宮皆洪武中知縣事張仲謹建。保定縣志

●增燕平書院在保定縣北門內。本朝乾隆二十三年，知州芮泰元建。大清一統志

●增玉河書院在保定縣北門內。本朝乾隆二十一年知縣孫似梅倡建。同上

●原保定軍砦二：桃花軍北七里；父母軍北一十一里。九域志

●增桃花砦，世傳楊延朗築屯軍士，基址尚存，今稱旋馬結達。保定縣志

原政和三年，改父母砦曰安寧。宋史

增將臺在縣西南，楊延朗演武之處。下多鐵汁，掘土者每見殘戟。保定縣志

〔臣等謹按〕保定在宋時最爲重地，是以楊延朗守此以鎮三關。北以霸州爲一關，西以雄州爲一關，又白溝河爲一關。其團練兵馬處遺址尚存云。

增父母軍寨在城西八里，楊延朗守平戎時，感父業殉敵，祭父於此，今稱爲寨上。保定縣志

增六郎洞在東關，古傳通數十里，今失其處。同上

增張青口，衆流中一凸，千艘來集，爲保定、正定、河間三府行鹽要地，商賈貿易，水

路通衢。同上

增南鎮在城南十八里。同上

〔臣等謹按〕保定縣志，南鎮爲南北往來孔道，河流環繞，岸有古柏橫接如橋，行者便之，邑志謂之柏橋古渡。

原玉帶河在縣北，繞縣東南入於磁河。或曰卽霸水之下流也。方輿紀要

原磁河源自安州，聚九河之水，至雄縣爲瓦濟河，至保定縣爲磁河，入直沽。明一統志

增玉帶河上流有二派：一西北自新城縣來者曰北九河；一西南自任邱五官淀來者曰南六河。俱會於雄縣之毛兒灣，流入保定縣界爲玉帶河。大清一統志

〔臣等謹按〕縣治西北九河：一盧溝，一拒馬，一夾河，一琉璃，一胡良，一桑乾，一烏流，一白澗，一白溝。西南六河：一黑羊河，一一畝泉，一方順，一塘河，一沙河，一磁河。俱匯於保定。玉帶河亦名苑口河，是河容納衆派，全資千里堤岸以爲保障。且保定在河之南，文安又在保定之南，大城又在文安之南。保定之堤永固，則三縣皆受其福矣。

陸光旭修堤碑記 玉帶一河，爲白溝、溥沱、琉璃數十河之下渚，恃長堤百里以爲之防。鯨波一決，三邑其魚。官斯地者，生斯地者，固與堤爲命者也。夫以衆河之水聚一河則易決，以三邑之功禦一堤則易完。而歷來數失其防者何哉？一以民習之久玩也，曲突不事，而補亡羊。一以隣人之秦越視也。同舟勿心，剝牀奚及？夫霸州文大，幅員亘百餘里而遙，而堤則錯壤相間，或一邑分汛數處，或一堤數邑協修，自蘇橋迤東，文防居多，西則霸文相界，而盧各莊河干乃保疆分汛。十王堂者文堤也，接胡家墳保障者大城久不修之界岸也，靳家背後則保大所共有事也，何家道口則初爲大堤而今爲文堤也，過此南北橫堤則燕口達北村武各莊者隸平戎，向南則廣陵修汛注窩則平舒分工也。段落甚悉，形勢昭然。三邑父老之胸口中亦極了了。舊碑有曰文安五分，大城三分，保邑一分。蓋古人計害均勞，使犬牙相制者指臂牽連以使，此修彼應，良深意哉！旭以壬辰莫月筮宰平戎。越歲夏，適吳妖爲祟，靳家背後城堤危如累卵，牒呼不應，代荷鍤畚，豈天譴難回，狂龍夜潰，產蛙廬竈，稻蟹無遺，嗟此哀鴻，葬魚腹而徙四方不知其幾千百人也！乙未暮春，詔發帑金修築，同廣陵宰韓子斗山、廣文張子大章暨捕幕謝廷祐，拮据於斷堤流水之間。夏徂秋，凡四閱月而堤成。又張臬使委代築大城注窩等堤數百丈。是年也，幸馮夷息浪，新壘屹然，去國批倚，牽車而還故里矣。不意今夏之日，陽侯再肆，湧浪如雷，旭也，臨河而懼，疾呼鳩衆，駕土牛，操槍朽，五晝夜與蛟龍戰，而卒以堤全。廬舍幸免蜃魚之藻，居人始有稻粱之謀。於是紳士民僉欣然曰：是堤也，築於令，修於令，令之心骨竭於堤，堤之利害悉於令。盍鐫數語以爲後日券？因聊叙顛末於貞珉焉。凡百君子慎之哉！居安而虞，逝波其淪。臨深而惕，城維衆志。毋曰一簣，九仞功虧。毋曰涓涓，江河因之。詩不云乎，迨天之未陰雨，徹彼桑土。凡百君子慎之哉！毋忘鼙鼓！順治丙申立石。保定縣志

王各莊引河自玉帶河起至中亭河止，橫亘三千一百餘丈。乾隆十年開挖，二十九年疏濬。

大清一統志

〔臣等謹按〕大清一統志，王各莊引河舊名十望河，爲玉帶河分流。其源自西北來者，由雄縣入保定境，自西南來者由任邱縣入保定境，總匯於毛兒灣，至盧各莊下入霸州之中亭河。乾隆十年開挖二百四十丈，二十九年疏濬，至三十八年復展寬挖淤，詳見御製詩注中。

乾隆三十八年御製閱鷹嘴壩及鹿瞳引河處詩以示直隸總督周元理 前歲決口凡兩處，東則鹿瞳西鷹嘴。堵築長堤已完善，或再逢漲慮後此。況均臨近受頂衝，取直引河固其理。插標備覽取進止，就我所知無不指。鹿瞳渠長已合宜，鷹嘴渠短應西徙。鹿瞳引河，周元理擬挑九百丈，足資取直之益，卽如所擬行。其鷹嘴壩曲處，止擬挑引河一百二十七丈，勢促而渠短，河猶頂衝，不能引溜以化險工。因指令徙西展長百十丈，使不逼近大堤。河防原以衛民，卽多費亦弗靳也。籌民惜費我弗爲，督吏鳩工爾其亶。

〔臣等謹按〕鷹嘴壩鹿瞳引河御製詩，謹繹有關紀述者，恭載卷內。

原二里城在縣東北，宋時積糧於此。保定縣志

〔臣等謹按〕二里城今有遺址。

原保定堤自路瞳村起，直抵西營唐頭等村，計長四十里，其南與文安界，而北則霸州也。議者謂決霸州之堤以疏水性，而築大堤於南以衛文安，則畿南十數州可免於水患矣。名勝志

保定堤卽千里長堤，明永樂六年知縣王孟原所築，舊爲秋水冲決，乾隆三十七修築。

保定縣志

黃猶岡在路瞳東北隅。登眺其上，野花香滿，禾穗鱗層，清流環繞，綠樹陰濃。同上

〔臣等謹按〕路瞳卽鹿瞳，其東北隅尚存小土阜，土人傳爲黃猶岡。

原漢張堪墓在城西南二里。保定縣志

〔臣等謹按〕後漢書，張堪拜漁陽太守，開稻田八千餘頃，致民殷富。百姓歌之曰：桑無附枝，麥秀兩岐。張君爲政，樂不可支。視事八年，其葬處史無明文，非如朱邑桐鄉之鑿有可據。惟考保定於漢爲涿郡易縣地，與漁陽郡統屬幽州，其界相連，或亦堪遺愛所在。然其蹟已不可復辨矣。

原唐竇建德墓在城西南二十里。保定縣志

〔朱熹尊原按〕新、舊唐書，建德於陣前俘獲，戮於長安市。保定有墓，未必真也。

增天寧寺在城東北隅。保定縣志

〔臣等謹按〕天寧寺未詳始建年月，有弘治元年僧隱庵撰重建碑記，爲邑之鉅刹。有古鐘，聲振十餘里。今鐘樓雖廢，而鐘尚存。

明僧隱庵天寧寺重建碑畧，保定縣城東北隅有吉壤爽塏，昔人卽其地建精藍，榜曰天寧，實圻內之鉅刹也。經始未遑究其年代。元季寺毀，迨宣德改元，洞明禪師甫棲之，觀茲廢跡，遂奮志興復。先於西山伐杞梓楸楠，塞川而

下，甄陶甃瓴，堆邱積岳。於是漸次締構，邑民施捨者旁午絡繹。其制先建殿庭，至若丈室神祠祖堂，繚垣屹立，回廊四合。厥志未就，付屬弟子遠悟。遠悟能不負所屬，以興修爲己任。前建天王殿，并禪堂齋廡泊山門，凡叢林所宜有者，以次修畢。遂能化瓦礫爲祇園，幻荆棘爲金刹。猗歟盛哉！余嘗謂格理盡性，爲人道之本，僧園法物，乃宏道之資。欲樹其本，必賴其資。今茲營建，使樹其本者有所資，宏其道者有所託，其於佛門可謂大有功矣。遠悟不遠千里，謁予爲文，茂揚成績，詞不逮意，直言其梗概，勒諸貞珉，庸示悠久云。弘治元年歲在戊申四月日立。保定縣志

欽定日下舊聞考卷一百二十二

京畿

文安縣

〔原文〕文安縣在州城南七十里。

明一統志

〔臣等謹按〕文安，元明皆屬霸州，本朝改隸順天府。

〔增〕文安縣在府南二百四十里，東西距五十八里，南北距七十里。東至大城縣界四十里，西至保定縣界十八里，南至河間府任邱縣界三十里，北至霸州界四十里，東南至大城縣治五十里，西南至任邱縣治七十里，東北至東安縣治一百二十里，西北至保定縣治四十里。
大清一統志

〔原〕文安漢縣，屬渤海郡，東漢屬河間國，和帝二年置瀛州，以縣屬焉。

清類天文分野之書

〔原〕晉泰始元年，分瀛州之東平舒、文安、章武、東州置章武國，縣在古文安城。至後魏太平十一年，置瀛州以統章武縣，遂歸瀛州。北齊廢章武，入文安。隋大業七年，征遼，途經於河口。當三河合流之處，割文安、平館、三邑戶於河口置豐利縣。隋末亂離，百

姓南移。唐貞觀二年，以豐利、文安二縣相逼，遂廢文安城，移文安民就豐利城，置文安縣，即今理也。太平寰宇記

原唐初屬瀛州，景雲二年屬莫州，周顯德六年屬霸州。九域志

原宋景祐元年，省永清入文安，移州治於此。皇祐元年，復徙治故地。清類天文分野之書

原金大定中徙州治益津，以縣屬焉。方輿紀要

原元屬霸州，明因之。清類天文分野之書

原漢縣令趙夔創建土城，明正德九年知縣事王鼎重修，翰林院侍讀李時撰記。文安縣志

李時修城記 正德辛未，河北盜起，擄掠諸州縣，文安荼毒最甚，坐城之廢故也。歲癸酉，齊東王君來尹是邑，顧而嘆曰：民保於城，城關於令，城之廢，民不能生矣。乃集耆老論之，并力交作。興役於甲戌三月，閱明年乙亥秋訖工焉。城周圍九里，列雉堞，建樓櫓，題其門南曰來薰，北曰拱辰，東曰迎恩，西曰永定。由是文安之民欣欣焉賴以無恐。君名鼎，字公實。相是役者，縣丞王景沂也。薇花堂稟

〔臣等謹按〕縣志，明正德間知縣王鼎修城。計袤七里，高二丈五尺，城門五，角樓四，敵臺警鋪八，濠池沿城周圍一千二百七十丈，外護以堤。崇禎中，知縣張上春增高五尺，添砌甃堞甕城。本朝乾隆三十三年，知縣阮基領帑加磚砌城，添設門樓，修橋濬池。

原縣治，元皇慶元年，知縣事李祐修建。明洪武初，縣丞鄧士龍重修。儒學創自宋大觀八年，元皇慶中知縣楊潤李祐重建。泮池東北壁有大觀碑，宋徽宗手蹟也。文安縣志

〔臣等謹按〕宋徽宗碑今字蹟漫滅。

尚野重修文廟記 文安廟學，貞祐甲戌，金主南渡，焚蕩殆盡，僅存大觀八行之碑。再歷周宋，遼金祚終，皇元受命，肇開貢舉，優復中選，草昧漸革。世祖潛藩，賓禮師儒，務先學校。至元三年，勅上都建孔子廟，用敦化源。四方萬里，莫不知所振厲，黽勉從事。文安近在畿內，無以應德意。二仲釋奠，即其故基，表以草幕，苟簡不恭，觀者惻然。八年辛未，縣設教諭，以邑儒董君榮爲之。董君素有興復議，而病未能也。即言於縣，以國家方事襄樊，爲平宋張本，不獲所請。庚辰，以屋賃錢合若干緡，伐木湯川，往返千里，三歷寒暑，衆材始聚。瓦甃釘礎，黝聖丹漆，各輸所有，以後爲恥。卜日其吉，工力並作，不期月，禮殿四楹鼎鼎，宏敞靚深。先聖先師十哲，像設顯嚴，章施可徵，如一大府。惟從祀之室，大成之門，經畫井井，未克備舉，所謂再易之地，力盡而休。今復七歲矣。其在官者，主簿姚元、縣尉張瑛、縣尹楊潤、今縣尹李侯祐相繼而輔成之。二十八年，兩廡翼翼，繪像七十二子。明年，大門言言清靜。董君既沒，子道清學正，孫祜教諭承其事，如君存焉。大德辛丑，後以講堂，前以櫺星。至大四年，以雀育廡瓦，易版以甌。初，講堂有闕，至是戶牖端朗，階址堅整，燦然一新。李侯倅來謂予曰：文安廟學之廢，荆棘瓦礫者六十年。董君父子祖孫，勤苦四十餘年，卒成盛事，請文勒諸石，永資名教。野既允祐之請，且以廟學之本，告之曰：古者民以君爲師。書曰：若有恒性，克綏厥猷，惟后。孔子雖無其位，而綏猷修道之統不忍絕也。刪定贊修之後，理寓於六經。六經即天，天即聖人，故自天子以至庶人無一不可以學孔子。必反身思誠，存心養性，得夫廟之制，而不失其學之實，非徒王安石所謂近世法者也。邑令與董君父子祖孫之成學廟，亦豈韓愈所謂不能修事者哉？雖然，學必久而後成，野喜其民牧學官之克協而將行，又慮其始勤終怠而不繼也，因并附此以示無窮焉。 文安縣志

後漢書：度尚由上虞長遷文安令。註曰：文安縣故城在今瀛州文安縣東北。上同

舊文安城，寰宇記在縣東北三十里。今柳河有古城正當艮隅，卽文安故城無疑矣。上

有漢縣令趙夔祠。上同

柳河鎮有渠。大清一統志

文安，潭名，潭在縣北一十五里。郡縣釋名

〔臣等謹按〕縣志，文安潭卽急流口。

〔原〕文安有狐狸淀。

隋書

〔原〕文安縣狐狸淀，俗謂之掘鯉淀。

隋圖經

〔朱彝尊原按〕掘鯉之淀，見左思魏都賦。

〔增〕石城淀在文安東北四十八里，又有慈老淀、黑母淀、落坡淀、四角淀，俱在縣東北，

又趙家泊，在東北六十里，卽太平寰宇記所謂滹沱河東溢爲趙淀也。

大清一統志

〔原〕水紋淀在縣西。宋起塘灤東自信安軍永濟渠，西至霸州莫金口，合水紋，得勝諸淀爲

一水，今廢。

方輿紀要

〔原〕火燒淀在縣東二十五里，廣四十餘畝。縣境有石溝、柳河、急河三水，皆聚流於此，

東入衛河，達於直沽。元志：河間府境有黃龍淀，自鎖井口開鑿至文安縣玳瑁口通灤

水，經火燒淀轉流入海。今湮廢。

同上

〔原〕易水在縣西，自保定轉流入境，卽沙河諸水下流也。

同上

〔增〕縣西北遙堤自白家道口至上五各莊，長八里。明萬曆間築。

大清一統志

〔臣等謹按〕縣志，白家口又名河家口。

〔原〕滹沱河水在縣西北三十里，又東溢爲趙淀。

太平寰宇記

〔原〕今川原改易，滹沱經縣東南，不經縣西矣。

方輿紀要

〔臣等謹按〕滹沱之環文安者三支：北支由河塘下白洋淀；中支由晉州天宮口至河間下五官淀；南支，卽子牙河也。又最南一支，由深州衡水清河單家橋下青縣入御河。後諸支俱淤，惟子牙河一支會諸流滙三角淀。今益改而東，下流逕會清河達西沽矣。

霸州苦水，而文安形如釜底，尤爲諸水所滙。其苑家口會同河與栲栳圈新挑河各東西里，屹如長城。累年有秋，實賴於此。但築堤愈高，壅水愈甚。故議者謂京師之南水害以霸州文安爲之阻也。長安客話

子牙河自河間流入，分二支：一西北流入文安縣石城淀；一北流又分三支：西支入文安縣黑母淀，東支入大小窩口，中支入霸州文爾淀，總滙於三角淀，入白河。大清一統志

〔臣等謹按〕通志，子牙河總會南北二泊滙諸水，而滹沱實爲經流。其性湍悍，伏秋水發，河間以北，靜海以南，皆當其衝。康熙三十九年聖祖新閱河工，特授方畧，於獻縣河間東西兩岸築長堤，西接大城，東接靜海，各二百餘里。又於東堤廣福樓之焦家口開新河一道，東北至賈口入淀。特設分司一員董其事，自是瀕河之民咸獲寧宇矣。

〔又按〕康熙四十年，聖祖巡視子牙河壩，以御臨唐太宗所書漢文帝勸農詔賜撫臣李光地。同知臣楊朝麟勒石。

聖祖仁皇帝御製巡子牙河建壩詩 暫別宮槐幸子牙，近村處處少人家。清河微暑浮畦麥，綠樹初陰接岸沙。堤外草荒艱籽粒，淀中水淺捕魚鰕。黃童白叟望霖雨，霖雨先施莫自賒。

乾隆三十二年御製恭依皇祖閱子牙河詩韻

有子牙河

序 子牙河，滹沱下游也，逕大城縣之子牙

村，始得是名。夫滹沱在昔卽已著稱，而子牙之名則非古。乃縣志謂其地有子牙廟，卽釣臺遺址，所言無足據。按史記載，呂尚以魚釣于周西伯，西伯獵遇於渭之陽。注引酈道元、劉向之說以證。雖磻溪、渭渚，釣迹不同，而其地尚皆近岐西。故文王出獵得遇之，自爲可信。至此地距岐數千里，安得有釣璜遇主事？蓋古蹟流傳，率多假借，不特釣臺說涉荒唐，卽以大城爲東海之濱亦非確鑿不移者。紀載家傳會失實者多矣。子牙村之釣臺何獨不然？既閱河成詩，并爲序而正之。滹沱至此號姜牙，傳會從來紀載家。北界地高南界下，八分水帶二分沙。籌防沃土資堪黍，庶免村人歎作鰕。碑仰行間將字裏，愛民肫意緬懷賒。

乾隆三十五年御製再依皇祖閱子牙河詩韻 謾議滹沱訛子牙，

滹沱河以經大城縣之子牙村，遂有子牙河之名。舊志因傳會

其地有釣臺遺蹟。丁亥春，巡閱河堤，曾依皇祖詩韻，並於詩序辨呂尚釣璜不應在此，一家秦趙詎殊家？麥以訂其訛。雖然，天下一家，奚分秦趙？總在大地之內，此一轉語亦不可少也。

因淀潤纔出土，柳偃堤風欲捲沙。籌畫當年仰疏瀹，閭閻今日利魚鰕。觀民要爲去聲安民計，咫尺穹碑法豈賒？

乾隆三十八年御製三依皇祖閱子牙河詩韻 東溜沿河有鋸牙，經村因遂屬姜家。子牙河本

渚沱下游，以經大城縣之子牙村，始得是名。向曾於和韻詩序訂正其誤，繼復爲轉語解之。然河因人得名，且其說無稽，究不足爲正也。人清本是東歸海，隔運都緣西挾沙。

堤外資耕黍與稻，水中任取蟹和鰕。屢巡總爲蒼生計，繩繼無遑企蹟賒。

〔臣等謹按〕子牙河御製詩，謹繹有關紀述者恭載卷內，餘不備錄。

蘇家橋在縣東二十里，當往來之孔道。靖難初，燕王自固安縣渡巨馬河，駐師蘇家

橋，卽此。方輿紀要

〔朱彝尊原按〕蘇橋，縣志謂蘇明允故蹟，載詩云：蘇公曾授文安簿，河上蘇橋自昔傳。然明允爲文安主簿，以修禮書授秩，未嘗赴州也。

〔臣等謹按〕文安堤在霸州苑家口，經蘇橋堂頭村至土橋村，長九千餘丈。乾隆二十六年，河水漫溢，築護月堤草壩。三十二年，自三灘里西接千里長堤，築格淀約二千餘丈，新舊堤岸各長一萬一千餘丈。

蘇家橋恭建行宮。文安縣冊